

तुबारि संपादकीय
टीम

◆अस इ उम्मिद करुं लगो
से कि एण बाड़े दिन
अन्तर सुआ मेहणु इस कम
अन्तर सहयोग कते।

◆इस तुबारि मासिक पत्रिका
समाचार पत्र एकट अन्तर
रिजिस्ट्रि नेई भो। सिर्फ पांगि
घाटि अन्तर पढ्ूं जे इ
पत्रिका शुरु कियो सि।

◆तुबारि यक अवाणिज्यिक
पत्रिका भो।

◆तुबारि पत्रिका कोइ मेहणु,
जनजाति, त संस्कृति गलित
कट्टेण जे नेई छपाण लगो। अगर
कोइ ई सोचता बि त अस
जिम्मेवार नेई।

◆छपाणे पेहले सोभ आर्टिकल
दुई टाई पागेई मेहणु हुरालो
असे। इ त खुलि बोक असि कि
पेहलि बार पांगवाड़ी लिखणे
सुआ मुशकिल भुन्ति त गलति
बि भुन्ति। अगर कोइ लिखणे
गलति असि त असि जे जरूर
बोले। त अस तसे होरे संस्करण
पुठ ठीक करणे कोशिश कते।

◆आर्टिकल ना मिलए, या
घाटि मेहणु के मदद ना मिलए
त तुबारि पत्रिका कदि बि बंद
भुई सकति।

◆कोइ चिज छपां सि या नेई
छपां जे तुबारि संपादकीय टीम
पुरा अधिकार असा।

◆अस किलाड़ केन्द्रीय
पुस्तकालय, त बजार राखे ठेके
भैड हरिरामे दुकान अन्तर
तुबारि ट्रांफ बॉक्स पुठ बि अपुं
सझाव ओर आर्टिकलस रखुं जे
सुविधा कियो असि।

◆अस सोभि पांगि
मेहणु जे हात जोड़ कई
निवेदन कते कि, तुस
बि कोइ अच्छा आर्टिकल,
पुराणि या नौई कथा,
कहावत, कविता, त
नौवे घीत (पांगवाड़ी
अन्तर) लिख कइ छपां
जे हेंनदे दिए।

तुबारि संपादकीय टीम


9418431531

9418429574

9418329200

9418411199

9418411599



'तकड़े असे ना'

तुबारि संपादकीय टीम कनारा सोभि तुबारि
पढ़णे बाड़ी, लेखक त दुकानदारी के
मदत जे धन्यवाद।

'पंगेई सोभि मेहणु जे जकारु बधे!



नजरिया

चम्पा ठाकुर


न धरती बोड़ि, पर मेहणु फिर दुई केआं चोउर भुई गे। कुवा जमाणणे चक्कर अन्तर,
सुआ बोडा परिवार भोईगा। भगवान सूरी सूरी कई, जिखेई कुवा यक जम गा। कुवा छाति
जोई लाई कई, ई सोचु कि सोब सपने पुरे भोई गे। गभुरु पढ़ाणे बी चिंता, त रोटि झणे बी
नसीब न भुए। जिन्दगी अन्तर गरीबी एई गइ, त कष्ट बी सुआ भोई गए। बारि जिखेई
पढ़ाणे आई, त कुई के इच्छा दबाई छई। कुवा जिखेई लघा स्कूल, ई लगु कि सोब सपने
पुरिगे। कुई के इच्छा दवाई कई, ई लगु सुआ खुश भुई गे। कइ छड़ा तेन्के बियाह
मठड़ियारि, जी तेन्हि पुठ एहसान किआ। कुवा बी तोउं तक्कर पढ़ि कई, झटपट सरकारे
नौखर बणि गा। कर्जा कर कई बियाह किआ, त जुएली घिन कई घेईगा। तिखेई टुटि कई
दुखि भुए, त हंठि फिरि बी न सके। कुवाए न भो गिहे बारिस, कुई बी भो गिहे शान। यक
कुवा पढ़ियाल त यके मेहणु पढ़ा, कुई पढ़णे बोलिये पढ़िगे केहि खानदान। कुई कुवा अन्तर
न लोता भेद भो, बस सोब लोते पढ़ो। बोते कि, अब बन्न करे कुई अपमान करण। कोइए
चाह अन्तर कुई जे शराप न दिए, जिहणु केआं इ संसार भुआ तेन्हि जे दिये अशूश।

जिन्दगी की भो

शुभम

यक मेहणु पुछु कि जिन्दगी कि भो? काणे बोलु कि हेरणु ई जिन्दगी भो। लटे बोलु
हठुणु जिन्दगी भो। प्यार करणे बाड़े बोलु प्यार करुण जिन्दगी भो। न उमीदे बोलु उमीद
रखणि जिन्दगी भो। अनाहरे बोलु टागड़ियारे जिन्दगी भो। दुखिए बोलु सुखी भुण जिन्दगी
भो। अकेले बोलु साथ बिशुणु जिन्दगी भो। रोलणे बोलु हसणु जिन्दगी भो। गरीबे बोलु
अमीर बणुण जिन्दगी भो। झूठे बोलु सचाई जिन्दगी भो। अगर कऊं मोउं केआं पुछियाल कि
जिन्दगी कि भो त अउं बोता..... बड़ाई कइ गवाण त गवोइ कइ बणाणे जिन्दगी
भो।

पुराणे जमाने यक बोक असी। यक गां यक कुवा थिआ। से सुआ लेहरोठा थिआ। तेस धिक-धिक बोकि पुठ बि सुआ लेहर एन्तीथ, त मेहणु जे भलु-बुरु बोलुण लग घेन्तथ। तसे एस आदती बेलिए परीशान भोइ कइ यक रोज तसे बोउए तसे धे यक बैग भरी मिएखि दती त बोलु, 'अब जपल बि तोउ लेहर एइएल त इस बेग अन्तरा मिएखि कइ त ओस थम अन्तर डूबा।



पहेलकण रोज तेस कुवा चढि लिंगि लेहर आइ त तेन अतरे लिंगि मिएखि थम अन्तर डूबेइ छइ। से रोज के तिहाणि कतथ, जीं लेहर एन्तीथ तीं से मिएखि डूबतथ। पर मठे-मठे मिएखि डूबाण घटती गइ। तेस लगुण लगु कि मिएखि डूबण जे अति मेहनत करण केआं त खरु असु कि अउं अपु लेहर काबू करण शिचुण। पता किछ इ हफती अन्तर तेन अपु लेहर सुआ काबू कइ छइ। त फि यक रोज ईं बि आ कि तेन अपु लेहर मुकइ छइ।

जपल तेन अपु बोउ जे ए बोक बतइ त तन्हि फि तसे धे यक कम दी छउं। तन्हि बोलु, 'अब हरेक तेस-तेस रोज जेस-जेस रोज तोउ यक लिंगि बि लेहर न एइएल त इस थम जोइया यक-यक मिएखि बहर किइ छइ।' कोइए तहाणि किउ, तउं सुआ रोजे बाद से दन बि एइ गा जपल कोइए थम अन्तरा अखिरी मिएखि बि भीं कीढ छइ, त खुश भोइ कइ अपु बोउ जे ए बोक बतइ।

तपल बोउए कोइए हथ टइ कइ से तेस थम केई निआ, त बोलु, 'कोइया, तेई सुआ अबल कम किउ, पर कि तु थम अन्तर कियो अन्हि छिन्डी हेरण लगो असा ना? अब त ए थम कदि बि तीं न बण सकता, जीं ए पहेले थिआ। जपल तु लेहरिए पुठ किछ बोता त से बोके बि इहाणि समाड़ी बिशो तेस मेहणु मन अन्तर घा कते।' तउं त होर फेरी लेहर कढण केआं पहेलाइ सोची दे कि तु एस थम अन्तर हउ मिएखि डूबाण चहंता ना?

मजाक

मजाक कसेरी कपले बि ना बणाण, दिल कसेरी कपले बि ना दुखाण। सुआ नजुक भुन्ते रिश्ते तन्हि कपले बि दुख ना देण। कसे गरीब मेहणु मजबूरी पुठ कपले बि हसुण नऊ। हसाइ करणे बि यक हद भुन्ती, से हद कदि लंघीण नऊ। हसाइ करणे मतलब हस-खेल कइ टेम पास करण, हसाइे बेलिए मन-मुटाव ना करण।

दुइ मेहणु झगड़ी लगो थिए.....

बबीता

तैं अती हिम्मत ना अउं
तैं खटिया खड़ी कइ
छता.....।



हाँ.....हाँ.... खटिया
खड़ी करण तैं बसे
कम नेइ, अउं त भीं
उंघता.....।

ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please 9418429574

सोभि पंगेई मेहणु के छने -अरे कते हियुंत मेहना लगो असा त सुआ ठन्यारी असी। तिहार बि लगो असे त सुआ अराख न पिए। अपु कुई-चीड़ी त सकि नति जोइ तिहार मनाए। सुआ अराख पी कइ अपु सेहद खराब न करें।

